



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

Madhya Pradesh nung yi
nokdangtsü tebilemba lir

US-i ceasefire atema sentong benokba
yagibo Gaza nung maneni tepsettsü



VOL. XXII ISSUE NO. 226 (ADOK 226)

DIMAPUR

KÜPTOKNÜ (SATURDAY)

MONUPII (MAY) 31, 2025

₹ 5.00

Dimapur Watsü Telongjem-i Reny Wilfred aitsür

Dimapur, May 30, 2025 (TYO): Nagaland sorkar ketdangsür Reny Wilfred-i IDAN nung tetsür mapa inyakterem dak tim masüba mapa inyakba atema tebilemtsü tulu abener aser sorkari pa mapa nungi anentsüba atema tenünsang agütsür ta Dimapur Watsü Telongjem-i metetdaksüogo.

Item ya odang atalokba masü kechiyong taoba nunga Reny Wilfred-i kasa mapa inyakba ken o temadoka liasü. Anungji sorkari item ken o arokaroka bushisüngdangtsü aser ozüing den apet temerenshi agütsütsü ayongzüker ta Dimapur Watsü Telongjem-isa ashi.

Tetsür dak tim mesüi kongshiba aser timtem agütsüba

ya ozüing alema inyakba mapa tulu ka lir. Tongti sorkar ketdangsür kati iba ama mapa inyakba angashidang kanga aoksar aser iba ama mapa inyakterem tekaratiba nung merenshitsüla ta DWT-isa ashi.

Timtem aser khuret aremdi ta ser tasü itta ochi jembiba tetsürtem nem tenünsang agütsür. Parnoki adokba ola angashitsüla, amangtsüla aser tim mapa inyaksüla ta parnokisa ashi.

Nagaland State Commission for Women-ia item tatalokba atema ola adokba aser police tsüngdang ken o benokba atema tenünsang agütsür ta Dimapur Watsü Telongjem-isa metetdaksü.

ECI Principal Secretary-i Nagaland semdanger

Dimapur, May 30, 2025 (TYO): Election Commission of India nungi Principal Secretary N.T. Bhutia-i May 30, 2025 nü Chief Electoral Officer, Nagaland Bhagyashree Banayat, IAS aser ketdangsürtem den senden ka menogo.

Iba senden nung elections agiba, Special Summary

Revision of Electoral Rolls, manpower, IT, office building amala infrastructures onüktem benoka lemsatsep.

Principal Secretary Bhutia-isa Kohima, Chümoukedima aser Dimapur nung polling station kar sema senzütsü aser Booth Level Officers den ajurutepa sensaksemtsü.

Pagala Pahar nung nisung ka onset



Dimapur, May 30, 2025 (TYO): NH 29 nung New Chümoukedima anasa Pagala Pahar nung lung agi truck gari driver ka onset.

Iba lendong ya Hokolbarnep 8:00 ako meta atalok aser nüngküm nungi lung ka longzüka alur truck gari driver onset.

Iba nisung ya Abdul Salam Laskar (28) ta jangjaogo aser pa ya Jharnapani nungi Chümoukedima-i arudang lendong ajuru.

Pa ya Niuland district kübok New Showuba village nung telidak liasü saka pa ya Hailakandi district, Assam kübok Dinanathpur nung liasü.

Nagaland deputy chief minister aser national highways

minister in charge TR Zeliang-i iba lendong atema temulung raksaba aser mangyimba metetdaksüogo.

"Tzü agi ponger aoba lenmang yangluba tesem nung iba lendong atalok. M/s Maccaferri Pvt. Ltd. ajanga rockfall barriers aser netting enokba mapa teinyakdak lir saka lenmang tang teyangludak asüba agi iba tesem nung mapa metenzük lir" ta TR Zeliang-i ashi. Iba onük National Highways Infrastructure Development Corporation Ltd. den jembitsü ta paisa ashi.

Iba tesem nung senzusenbongertem kümzüka ayutsü atema state sorkari akokba tashi yaritepa inyaksü ta Zeliang-isa metetdaksü.

CNWA pur mezüngbuba inti senden Mokokchung nung takok ngua mungogo



Advisor, Industries & Commerce, Hekani Jakhalu addressing at the 1st General Conference of Central Nagaland Women Association (CNWA) at Town Hall, Mokokchung on May 30, 2025.



Mokokchung, 30 May (TYO): Central Nagaland Women Association (CNWA) pur mezüngbuba inti mungdang sentong yangi Mokokchung town hall nung 30th May, 2025 nü takok ngua kaogo.

CNWA ya Ao, Sümi aser Lotha kin asem senteper akümba tentet ka lir. Iba mungdang nung kin asem nungi tetsür meyi ka jungnüa adenshir kanga longsoa mungogo.

Iba sentong nung tongti tejaoker MLA & Advisor, Industries & Commerce Govt. of Nagaland, Hekani Jakhalu-i jembidang, tanü tangar den medemdangra Nagatsür-a lenmang aisü nung tangar atoksa atudar, saka yimden yimli telemtetba agiba nung dang asenok ano jenjang ka metongteti lir, ta metetdaksü.

Tetsürtema teburtem den sakuku telemtetba agiba nung densemtsü asenoki sarasadema aruba ama, Tsüngremi ibaji langzüa tanü Minister Salhoutuonuo Kruse tena tetsür rangben meyonga noktaka lir,

anungji, iba ya maongka tulu asoshi pelar aser nüma atanger, ta lai ashi. Iba dak sentakba nung tena Nagaland Tatar Salang nung züingsemstsüa jenjang tongtetba ajanga tetsürtem asoshi lenmang ka yateta yutsür, ta lai ashi.

Bendangli tesem balala nung degree balala züingaka, yimden yimli nung telemtetba agiba tsütsübo shilem agitsü tasü meitteti lia aruogo, saka tanübo tetsür atema jenjangmung ya yutsüogo. Iba yagi tarutsü asen chirtem nem tangar den tsüngkang medema Naga lima yangluba nung shilem agitetsü imlar, ta laisa shisem.

Iba ya teburtem den anemteptsü aser parnok tashi rakzütsü atema masü, saka tetsürtema tebur den atongsema sakuku maongka agia alima yangluba nung shilem agitsü tangatetba nung jembir, ta lai ashi.

Laisa telungjem lidaksünüba olen ka lemsatepdang, tanü Naga lokti ya kanga mejungi lemdanga lir, arogo densema

telungpur/temapur lokti kecha nunga telungjem mali, anungji, CNWA ya kin asem sanger lungjemtsü atema dang masü, Naga lokti songjen ajungtsü nükla yur inyaksü tayongzüka agütsü.

Tsüngremi tetsürji balaka nung yanglu, anungji, Pai moatsüba sempettem jagi tanü Naga lokti nung telemsa tulu adoker aliba mapang ka nung, tetsürtemi telungjem maparen nung shilem agitsü asoshi lai ajungshi. Laishiba nungi Esther aser Jazebel jakla medema tetsürtemi alima asoshi tajunga/ tamajunga inyaktetba atishia lai ayongzüker.

Asenok asoshi rongsen tulutibaji asen chirnurtem ya lir. aji oda, asen lima mapa manguba tebilemtsü ya ulura. Tanü alima nung ya maongka jenti lir, saka asenoki item maongkaji magiteter, ta lai lanurtem den küm talangka inyaka arudang ajangshiba kuli kar ashi. Laisa mapa tila nungi tenzüksü asoshi ajungshia liasü.

(Maneni tapak 2 nung...)

KSU-i Reservation Policy meyipa reprangshitsü pusemer

Dimapur, May 30, 2025 (TYO): Five Tribes Committee on Review of Reservation Policy (CoRRP)-i Nagaland State Reservation Policy meyipa reprangshitsü akhangba pusema nungiter ta Konyak Students' Union (KSU)-i sangdong ka nung metetdaksüogo.

Tangutsüpur ajaki kasa maongka angutsü atema nütsüing yongsük nung ajemdaker reservation system ka alitsüla. Reservation policy tiptema yanglushiba nung alinük nung nütsüing yongsük atema tongti süa inyaksüla ta KSU-i ashi.

Nagaland nung küm 48 tashi iba policy benshia arudang

Konyak nungeri tajangzüker mangu. Nagaland nung reservation policy shitak meinyakba aser quota tim mesüi alemba ajanga Konyak nunger maneni socio-economically backward communities rongnung dena lir ta KSU-i ashi.

Konyak nunger nütsüing yongsük lakh 2.50 tema lir aser iba ya Nagaland nütsüing yongsük nung 12% shi lir. Ajisüaka sorkar mapatem nung Konyak nunger nübo peria mali aser ibaji Department of Economics and Statistics 2019 report nunga shia lir ta KSU-isa metetdaksü.

"Tanü tashi Konyak nunger yimtsüingtem dang masü saka

tzükong ajunga nungi aser Assembly Constituency nungia NPSC-recruited Class I gazetted officer ka danga mali lir. 2011 census records nung Mon district ya lowest literacy rate (56.60%) ta shia lir" ta parnokisa ashi.

Shisaliok shitak mesayuba aser public sector employment nung medensemba ajanga Konyak nunger kanga tajemzüker tia ka nung lir. State sorkar dang reservation policy meyipa reprangshitsü aiben mepishia aruaka telangzüba tajung kecha mali anungji Five Tribes Committee-i akhangba pusema nungiter ta KSU-isa ashi.

DDL SA ajanga Consumer Awareness Programme ayongzük



Dimapur, Monupii/May 30 (TYO): Dimapur District Legal Services Authority ajanga Department of Legal Metrology and Consumer Protection, Dimapur den lungjemer "Know Your Rights" omen nung ajemdaker May 29 & 30, 2025 anogotem Seithekema C, Chümoukedima aser Little Star Higher Secondary School, Dimapur nung Consumer Awareness Programme ayongzuka liasü.

May 29 nü sentong nung Nishela Assumi, Panel Lawyer menden liasü aser May 30 nü sentong nung Visheli Yeptho menden liasü.

Iba sentong nung shisalen sayur ya Sonile Seb, Retainer Lawyer; Zuchumpeni Ngullie,

Panel Lawyer aser Rokovitsu Khate, Panel Lawyer nungertem liasü.

Shisalen sayur temi iba sentong nung Consumer Protection Act, 2019 indang rateta ashi aser tajangshiba nung ajemdaker jembia liasü.

Sentong anaprong nung Er. Ngangshimakok, Assistant Controller, LMCP, Dimapur ajanga tayongzükba o jembidang, Consumer Protection Act, 2019 yagi India nung consumer temeden balala agüja lir ta ashi aser fundamental Consumer Rights trok indang jembia liasü.

Pai "Jago Grahak Jago" indang nenshia ashi, koba consumer awareness program ka lir aser Ministry of

Consumer, Government of India ajanga 2005 küm customers nem tashi agüja tenzük.

Iba sentong kübok consumer temi osettsüset alidang aser services agidang telemtetba tajung agitsüsa osang agütsür.

Iba scheme ya kanga nüngtugu kumogo aser shishilempar temi tim masüba mapa inyakba anendaktsür aser consumer nung products tajung agütsür, ta ashi.

Sentong ana nung melepzüng o ya Thungchumo Jami, Vice-Chairman, Lotha Ekhung, Seithekema C aser Christina Neikhrienuo, Principal, Little Star Hr. Secondary School ajanga jembia liasü.

Nagaland Solar Mission Sensitization Program Dimapur nung agi



Dimapur, Monupii/May 30 (TYO): Department of Power, Government of Nagaland ajanga Nagaland Solar Mission (NSM) indang Sensitization Program ka May 30, 2025 nü Deputy Commissioner, Dimapur indang Conference Hall nung Ministry of New and

Renewable Energy kübok PM Surya Ghar: Muft Bijli Yojana (PMSG:MBY) den lirumedema agia liasü.

Iba sentong nung Deputy Commissioner, Dimapur. Dr. Tinojongshi Chang menden liasü aser state nung solar energy ya tamang katetba power source tajung lir ta nüburtem angatetdakja shilem agidaktsütsü nükjidong nung iba sentong ya ayongzük ta ashi.

Nagaland Chief Secretary, Dr. J. Alam, IAS ajanga state indang solar energy sentong semzükba mapang Dimapur ya

"mini Nagaland" lir ta ashi aser Dimapur nung takok anguba ajanga state nung tanüngba tesemtem atema model ka ama alitsü, ta ashi.

"Dimapur-i angateterbo, Nagaland ajungai angatettsü," ta pai ashi.

April 14 nü semzükba solar mission ya state-level sentong ka lir, koba central sorkar indang PM Surya Ghar: Muft Bijli Yojana (PMSG:MBY) den mesüktepa lir. Iba sentong indang nükjidong ya Nagaland tesem ajungalen ki kilem nung solar system inoktsü asoshi lir.

(Maneni tapak 8 nung...)

NHPS ajanga ABPM-JAY aser CMHIS indang workshop ayongzük



Kohima, Monupii/May 30 (TYO): Nagaland Health Protection Society (NHPS) ajanga June 29 & 30, 2025 anogotem Capital Convention Centre, Kohima nung Ayushman Bharat Pradhan Mantri Jan Arogya Yojana aser Chief Minister Health

Insurance Scheme (AB PM-JAY/CMHIS) indang refresher workshop ayongzuka liasü.

Item scheme mapa kuma inyakba aser ketdangsüba nung tongipang stakeholders shilem agitsüba tajungba jung angatettsü aser tashi itshitsü

nükjidong nung iba workshop ya ayongzuka liasü.

Ajidang masü service delivery tajungba kumdaktsütsü aser iba scheme indang inyakyim lenla ajunga ochishia amshitsü nükjidong nung sentong ya ayongzük.

(Maneni tapak 8 nung...)

Principal Secretary ECI-i CEO Nagaland den senden amen

Dimapur, Monupii/May 30 (TYO): Election Commission of India nungi Principal Secretary, N.T. Bhutia-i Chief Electoral Officer, Nagaland aser ketdangsürtem den CEO office chamber, Kohima nung May 30, 2025 nü senden ka mena liasü.

Iba senden nung election

agitsüba dak sendakba ken o, Special Summary Revision of Electoral Rolls, nübu, IT, office building amala indang jembia liasü.

Principal Secretary-i Kohima, Chümoukedima aser Dimapur nung polling stations kar semdangtsü aser Booth Level Officers tem den sensaksem akatsü.

KPC, MPC, DPC & NSCN ajanga KV Nurumi asükhu lemsatep

Dimapur, Monupii/May 30 (TYO): Taoba Kohima Press Club tir KV Nurumi mapang tatsüka shiranga arur May 30, 2025 anepdang Olive Hospital Dimapur nung anojungi asüba osang angashia aoksar aser kanga jashir, ta Kohima Press Club sangdong ka ajanga ashi.

Asür KV Nurumi ya Zunheboto district kübok Aichisaghemi yimtsüng nungi lir aser 2010-2012 nung KPC tir inyaka liasü.

Pai Nagaland Post indang Correspondent ka ama küm aika inyak aser iba sülen ANI (Asian News International) den inyaka liasü aser "Trends of Nagaland" nüngja agütsür DDK Live discussion show nunga anchor ka liasü.

Asür Nurumi ya ajaki akumtsüboa aliba osangbener aser osangbener lanurtem asoshi shisalen sayur ka ama liasü.

Pa lenisüba ajanga KPC kibong nung kodanga mesamatsü tsügnep tajung yutsüogo, ta KPC sangdong ajanga ashi.

La lenisüba kübok KPC aintsü asoshi jenjang tulu aketba

mapa tajung inyakba onoki teti bilemtettsü. Mangyimer kibong den asükhu lemsateper aser pa kinungtsü aser jala ana nem Tsüngremi tashi, tesunep aser anisüngzük agüjang ta sarasademtsür, ta KPC sangdong ajanga ashi.

Ochi, temeim aser tasü tait mulungsentsü nung bendanga agütsür osangbener mapa inyaksang KV Nurumi anojungi aksüba osang angashia Mokokchung Press Club züngsemtemi mang ayimer, ta MPC sangdong ka ajanga ashi.

Mangyimer kibong den asükhu lemsateper aser asür tanüla teti tatem maka tesunep nung anisüngzükjangma, ta sangdong ajanga ashi.

Taoba mapang Kohima Press Club tir inyaka alisang KV Nurumi asüba osang angashia temulung khurema jashir, ta Dimapur Press Club sangdong ka ajanga ashi.

KV Nurumi ya osangbener temi kanga akumtsüboa aliba nübu ka liasü aser Nagaland Post, ANI aser Doordarshan densema media balala nung pai shilem tulu agia liasü, ta ashi.

(Maneni tapak 8 nung...)

CNWA pur mezüngbuba inti... (Tapak 1 nungi...)

Tanü joko government mapa angutsü lenmang kanga temesü, kanga meranga azünger kar dak alaka ajakibo maongka mengutettsü, anungji, private sector nung temulung agütsütsü mesüra tanü technology lima nung sen aahtsü lenmang sadema alinung, item temoatsü agia mapa balala inyaktsü laisa ajungshi.

Tanü joko India government indang mangdang Viksit Bharat@2047 dak rangloker linük ajak aotsüba lir, anungji, alima ainba den jangyu medema aintsü aser meranga inyaktsü lai ajungshi. Tapu aika jembiyonga nükla balala yuaka, Tsüngremer tadenba melira item ajakji amajok, anungji, tamang aser sarasadem nung akanga ametba tetsü kaka asütsü lai ayongzük.

Iba sentong nung CNTC President, Khondao Ngully-i tayongzükba o tulu bener arua lemsatep. Watsü Mungdang tir Tianaro Jamir aser Ao Senden tongti zülur, Imtipokym nadia salem o lemsatepa liasü. CNWA tir, K. Atoli Sema-i tarur

ajak pela agizük aser ano tangartemia shilem balala agia liasü.

Sobaliba sentong balaka ka agi aser iba nungji kin asem nungi telok balalai sobaliba ken, yar tsüngsang aser sobusolemtsü balala ia sayu. Iba sentong nung CNWA Cultural Secretary, Ghovili Achumi-i "tanü lokti nung sobaliba tongtibang" onük nung jembü.

Taruba kümsük 2025-2028 asoshi CNWA ketdangpur itemi shimtet:

1. President - Dr. Anungla Aier
2. Vice President - Zujano Patton
3. Vice President - Mughaholi A Chopi
4. General Secretary - Lily Sumi
5. Jt. Secretary - N. Chumchanbeni Odyuo
6. Jt. Secretary - Lily Longchar
7. Finance Secretary - Angelina Ngullie
8. Cultural Secretary - Sashisongla
9. Info. & Publicity Secretary - Nitoli Sema
10. Treasurer - Jennifer T Awomi



May 30, 2025 nü Indonesia yimtiba, Jakarta nung Operation Sindoor outreach telok ka nung lenir JD(U) MP, Sanjay Jha den Congress lenir Salman Khurshid, BJP MP- Aparajita Sarangi, Brij Lal, Pradan Baruah aser Hemang Joshi, TMC MP Abhishek Banerjee, CPI(M) lenir John Brittas, taoba mapang ambassador Mohan Kumar aser Ambassador of India to Indonesia Sandeep Chakravorty nungeri Nahdlatul Ulama Executive Board (PBNU) Chairman, Ulil Abshar Abdalla aser tongti ketdangsertem den senden amendang tangokba noksa nung angur.

Madhya Pradesh nungyi nokdangtsü tebilemba lir: Mohan Yadav

Bhopal, Monupii/May 30 (Agencies): Madhya Pradesh state sorkari yi meshimeshia nokdangtsü aser mamatzü ayokba ajungkettsütsü tebilemba lir, ta Hokolbarnü Chief Minister, Mohan Yadav-i metetdaksü.

Panna nung sentong ka nung jembidang Chief Minister Mohan Yadav-i, state sorkari yimti 19 nung municipal limits nungbo yi nokdangogo aser maneni teokdangba benoktsü, ta ashi.

"Yi ajanga kibongtem raksatsür. Ozü sorkari yi ayokba dokan ajak shibangtsüba sülen mamatzü ayokba dokan kümdaktsütsü tebilemba lir. Onoki scheme

balala ajanga animal husbandry ajungkettsütsü, talisa nashi kümzüksü atema inyaker. India nung nung sobaliba nung, nashi alir ka dang Gopal ta ajar aser nashi kibong anepalur dang Gokul ajar. Onoki nütsüng lakh 1 dak tali aliba yimtsüngtem nung 'Aadarsh Vrindavan' amenoktsü," ta pai metetdaksü.

India nung nashi mamatzü adokdaktsüba shilem 9 bo Madhya Pradesh state nungi lir, aser Chief Minister-i shilem 9 alibaji shilem 20 kümdaktsütsü nükjidong yur inyaker.

Iba dak alia cooperative milk procurement centres ajanga state tesem shilem 50 bo ayimjemtsü nükjidong lir. Taküm April 1 nü yimti 19

nung municipal limits nungbo yi ayokba nokdangogo. Item yimtiji temeshi yimtitem ama züngshitsü.

Ketdangsertemi ashiba agi, tang Madhya Pradesh nung composite liquor shops 3,600 shi lir. Tang excise policy tasenba ajanga Ujjain, Omkareshwar, Maheshwar, Mandleshwar, Orchha, Maihar, Chitrakoot aser Datia densema yimti aika nung yi ayokba nokdangtsü.

Ozüng tasenba kübok "Low Alcoholic Beverage Bar" ta ser category ka alitsü aser yangji beer, mejemtzü aser alcohol shilem 10 tashi dang aliba beverages dang ayoktsü melatsü.

Pakistan occupied Kashmir ya meyipa agütsütsüla: Salman Khurshid

New Delhi, May 30 (Agencies): Hokolbarnü Congress lenir aser taoba mapang Union minister Salman Khurshid-i, India nem Pakistan occupied Kashmir (PoK) meyipa agütsütsüla, ta ashi.

Paisa BJP-i aniba sorkari Jammu & Kashmir nung Arrla 370 agienba aser Operation Sindoor agiba atema tenüngsang agütsü.

Operation Sindoor outreach kübok Asia nung aliba linüktem semdanga Pakistan-i kiralongra pusemba aser India-i kiralongra anema raratsü melungtetba sangdongtsü atema shimtetba Parliamentary telok ka nung Khurshid-a densema lir.

Khurshid-i, "Mapang talangka nungi Kashmir nung timtem tulu ka lir. Sorkar tangatetba aser Arrla 370 ajanga Kashmir ya linük nungi piladaktsür ta aikati bilem. Ajisüaka Arrla 370 agienogo aser anenogo. Iba sülen J&K nung election agia voters shilem 65-i shilem agia liasü. Tanübo Jammu & Kashmir nung nüburtemi shimtetba sorkar lir," ta ashi.

Paisa, "Shinga danga ner linük shilem ka, Kashmir agüjang ta ashitsü makok. Onok ya kibong ka anungji shingaia ozü kibong raksatsütsü makok," ta ashi.

Osangbener den jembidang



Khurshid-i, "India tangatetbaji tejangja. Yimjung ali nung ang aser kiralongra anenba den külemi Indus Waters Treaty akhümtsübu nung ang Pakistan den ken o jembi tenzüksü," ta metetdaksü.

"India nunger Parliament nung ajaki, Pakistan-occupied Kashmir ya India nem meyipa agütsütsüla ta melungtetogo. Jammu & Kashmir assembly nunga menden karbo iba tesem (PoK) atemaji azüngtettsütsüla liasü," ta pai ashi.

Khurshid-isa, "Pakistan-i kiralongra pusemba manen tashi Indus Waters Treaty tezüngzüktep ya agiena atatsü," ta metetdaksü.

JD(U) MP Sanjay Kumar Jha-i aniba telok nungji Khurshid den Aparajita Sarangi (BJP), Abhishek Banerjee (TMC), Brij Lala (BJP), John Brittas (CPM), Pradan Baruah (BJP), Hemang Joshi (BJP) aser Mohan Kumar nunger lir.

Parnoki Japan, South Korea aser Singapore semdangogo aser ano linük kar semdangtsü.



May 30, 2025 nü Bogota, Columbia nung Congress lenir, Shashi Tharoor aser Shiv Sena lenir Milind Deora na den Indian Parliamentary telok kati Colombia nung osangbenertem den jembidang tangokba noksa nung angur.

Operation Sindoor sülen 'foreign policy' tamakok nguogo: Congress

New Delhi, May 30 (Agencies): Hokolbarnü Congress-i, Operation Sindoor sülen BJP-i aniba sorkari foreign policy nung tamakok nguogo, ta aitsü.

Congress lenir Pawan Khera-i, "Pahalgam sülen Operation Sindoor mapang nung foreign policy tamakok anguba asenoki nguogo. Linük kati danga Pakistan ya

kiralongra linük ta mashi. Iba ya nenok foreign policy tamakok ajanga lir. Iba sülen nenoki Operation Sindoor agi saka linük kati danga nenok pusema mejembi. Operation Sindoor agiba sülen Kuwait-i Pakistan nunger visa tenokdangba agienogo. Iran, UAE aser Gulf linüktemi Pakistan den MoUs sign asür. Yashi ang Russia-i steel mill asentenshir lapoktsü

atema Pakistan den tezüngzüktep agiogo. Iba kübok Pakistan-i Russia ket nungi dollar sen billion 2.6 angutsü. Item ajak ya nenok foreign policy tamakok ajanga lir," ta metetdaksü.

Ano külen Hokolbarnü Columbia nung Congress MP, Shashi Tharoor-i Colombia sorkar dang mepelaba metetdaksü.

(Maneni tapak 8 nung...)



बैंक ऑफ बड़ोदा
Bank of Baroda

NAGA BAZAR BRANCH
Razhu Point, Main Road, Kohima, Nagaland- 797001
Email: vjkohi@bankofbaroda.co.in

Kiojen ayoktsü atema Sale Notice
APPENDIX- IV-A [See proviso to Rule 6 (2) & 8 (6)]

Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker kiojen ayoktsü atema E-Auction Sale Notice agütsür.

Public aser talisa sen apur (tem), Mortgagor (tem) aser Guarantor (tem) dang, tsünglanglen metetdakja aliba aser Secured Creditor dang mortgaged/charged süa aliba kiojen Authorised Officer of Bank of Baroda, Secured Creditor-i agiadokogo ta sangdonger, aser ibaji tsünglanglen shia aliba account/s nung sentsüh alangzüksü atema "Kong aliar yamaji", "Koma lidir yamaji", aser "Yangji aliba ajak" nung ayoktsü. Sen apur/tem/Mortgagor/Guarantor/tem/Secured Asset/s/Dues/Reserve Price/e-Auction Anogo aser Mapang, EMD aser Bid Increase Amount tsünglanglen metetdaksür -

Srl/ Lot No.	Name & address of Borrower/s / Guarantor/ Mortgagors	Short description of the immovable property with known encumbrances, if any	Total Dues	Date of E-Auction, Time of E-Auction, Start Time to End Time	1. Reserve Price 2. Earnest Money Deposit (EMD) 3. Bid Increase Amount	Status of Possession (Constructive/ Physical/ Symbolic)	Property Inspection Date & Time
1.	MRS. SHAHILE BUKH, W/o Mr. Rushvuyhun Bukh, H/No. A-27, Peraciezie, Themezie High School Road, Kohima, Nagaland.	Equitable mortgage of Land measuring 2250 Sqft (209 Sq.m) and Building situated at House No. 24, Peraciezie, Themezie High School Road, Kohima, Nagaland. Bounded by:- East: Plot of Mr. Hilo Rengma, West: Plot of Shurhusele, North: Plot of Shurhusele, South: Plot of Giehulie Khing.	Rs. 17,48,304.30 (Rupees Seventeen Lakhs Forty Eight Thousand Three Hundred Four and Thirty Paise only) and interest thereon	Date: 01.07.2025 , Start Time: 01.00 pm End Time: 03.00 pm	1. Reserve Price: Rs. 47,26,000.00 2. Earnest Money Deposit: Rs. 4,72,600.00 3. Bid Increase Amount: Rs. 50,000/-	Symbolic Possession	27.06.2025 10:30 AM to 4:00 PM
2.	MR. VIBEIZOLIE Thenakhou, Zhadima Village, Kohima, Nagaland.	All that part and parcel of the property consisting of land and building area 8000 Sqft. in the name of Mr. Ketoulhoulie, S/o Khrielhoulie located at Thenakhou, Zadima Village is Bounded by:- On the North by: Kuotsu Clan, On the South by: Soliezuo Clan, On the East by: State Highway, On the West by: Kuotsu Clan.	Rs. 8,19,102.50 (Rupees Eight Lac Nineteen Thousand One Hundred Two and Paise Fifty Only) and interest thereon	Date: 01.07.2025 , Start Time: 01.00 pm End Time: 03.00 pm	1. Reserve Price: Rs. 17,96,000.00 2. Earnest Money Deposit: Rs. 1,79,600.00 3. Bid Increase Amount: Rs. 50,000/-	Symbolic Possession	27.06.2025 10:30 AM to 4:00 PM

Iba kiojen ayoktsü telatetbatem osang tejangja metettsü atema website link <https://www.bankofbaroda.in/e-auction> nung aser online auction portal <https://baanknet.com> nung reprangang. Iba dak alia 'bid' asütsü jangrartemi Authorised Officer den **Mobile: 77818 58949** ajanga tongtepreteptsü akok.

Date: 31.05.2025
Place: Kohima

Authorised Officer
Bank of Baroda

Congress aser RJD-i SC, ST aser OBC nisungtem ashiochtsür: PM Modi

Patna, May 30 (Agencies): Hokolbarnü Bihar nung Ato kilonser Narendra Modi-i, Congress aser RJD-i SC, ST aser OBC nisungtem ashiochtsür, ta aitsü.

Opposition INDIA teloktep nung densema aliba Congress aser RJD-i taküm Bihar assembly elections nung sorkar atsüngdoktsü meranger, ta pai ashi. Rohtas district kübok Karakat nung lokti senden ka nung jembidang Modi-i, RJD tongti lenir Lalu Prasad aser

(Maneni tapak 8 nung...)



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 31, 2025

Telok tentet aliba ya junger !

Nagaland nung lokti tentet onsara aliba indang kanga jembir aser aji tejembila jembir, kechiyong pei Yimtsüng Kaketshir, Senso Telongjem, Tetsür Telongjem aser Senso Mungdang nungi shir pei tüzükong, pei kidong ase pei kin telongjem ser külenang ano Naga nunger kin telongjem anasemka nung adentsüsa akümer. Item lokti tentettem denji ano arogo aser medemer telongjem tentet nunga mapang aser rongsen agütsütsüsa adoker, anungji telok mapa nung temulung agütsürtem asoshibo pei mapa inyaksübo kenüa mapang mangur. Ibayongji, nisung aikati asen lima nung lokti tentet onsara aliba indang maginüi kanga nemnemer, ajia shitak dang, kechiyong lokti tentet onsara tenteta liaka, lokti nung züngsem purtem nüngdak nung yariteptsüsa meinyakteter, anungji lokti asoshi mapang aser rongsen agütsüba dak alaka lokti nungibo kecha teyari mangur. Iba jagi lokti nung adenertem aikati lokti nung adenba ya amajok nung mapang aser rongsen endok amai dang bilemer. Ajisüaka, taoba US tir John F Kennedy-i ashiba ama, ozü limai ni asoshi kechi inyaksür ta bilemstsüba masü saka nia ozü lima asoshi kechi inyaksür ta bilemra, atangji, lokti nung dena pei lima aser nübortem asoshi shilem agibaji jangratemtsüka aser pei tata shilem shitak inyaker ta angatetsü. Nagaland ama state, kong kecha inyakyim shitak lateta maka aser kong ozüng agi masü saka pei pei aienba mapang pei pei mulungba inyaker, iba ama lima ka nung yimten temzüng ozüng metetba aser yimten inyakyim angatetba nisungtemi anir lokti tentet tashi itta alitsüba kanga nüngdaker. Talisa, tang ama, Nagaland government nungbo opposition mali ser ajak 'Ruling party' nung dener yimsü asüdag, Naga nunger lokti tentettem kaketshir aser lanurtemi anir Naga nunger tetsür aser tebur tentettem ajaki Nagaland government nem shisa tajung agüja yariteptsüla aser meshitak inyaka ngura metongshitsütsü ta aotsüba kanga nüngdaker. Atangji, lokti tentettemji government anemertem masü saka government yarirtem lir ta lokti tentet lenirtemia aser government nung alirtemia angateta inyaksüla. Aji oda, government-i inyakba ajakji lokti tentet nung züngsema aliba nübortem asoshi inyaker, anungji nübortemji government asoshi masü saka government-jiang lokti asoshi aser nübortem asoshi lir. Anungji, government-i latetba temzüng ozüng aser inyaksü lemtetba mapatem ajakji nübortem ajungtsü aser ajangzüksü asoshi asütsüla. Itemji ataloktsü atema democracy nung kanga kümküma aliba tangatet aser wainshin metetba lokti tentet nüngdaker. Atangji, lokti tentet tenteta liaka, küm piyong kecha meinyak kazür küm tatem nung lokti senden lir senshitsüba lokti tentetbo menüngdaker. Joko, lokti tentet tenteta liakaji, asen alidak asen lokti aser state nung nübortem timtem aser takoksa anguba reprangteta itemji yimten den jembia yaritsüla. Aji oda, asen adenba lokti tentetji nübortem timtem aser nüngdak reprangteta aser teyari lenmang sayutetba lokti tentet ka asütsüla. Aji oda, loktii tangar ka asoshi inyaksüba, ashiko, asüng asen asoshi inyaksür asütsüa akok. Joko, tentetkaji, loktiji tangaria meteta taküm alitsü tim, anungji nübortem asoshi ola adoktsüla aser temang arakzüka nüngdakba purtem nem teyari agütsütetba lokti asütsü tim. Tanü putu nungbo government dangbo lokti tentettem (NGOs)-iang terenlok mapatem inyaker, anungji lokti tentet lenirtemia mashi nisung masü saka zünga-shia metetba aser pei lima aser nübortem asoshi aria bilema inyakba lenir asütsü tim. Aji oda, alima ajungtsü atemabo lokti tentet kwika tenteta lir ta masü saka lokti tentettemia Nagaland nung yimten aser loktiliba ajungtsü asoshi koma inyaker ta asüba jiang tongtibangba asütsü.

OLEMSABANG

Temulungjang tashitak aser Cholesterol tesendaktep

Dr. N. Meren Imchen
Lower Bayavu Hill Kohima

Tanü neburtem kechisarena nung tashi temetet kanga kara-a aienba mapang ka asünung pei temang anema alitsü atema aneb-aluyim- mozü shiteter-sa mesüaka; lenmang aisu nungi eg. Osang kakettem, TV, internet aser media balala ajanga meteta akümer. Saka takok tashi item lenmangtem nungi anguba shisatsütemji mozü shiteter den azüngdangtepa amshitsü nungtaker, kechiaser spelling kar aibelena atoktsüba ajanga mozü taila mesura information taila angazüka temang nung timtem tulu mesura taküm-a aotsüsa kümdaktsütsü akok ta tekümdangtsü ka shisemer.

Medical nungja ka koba dang Cholesterol ta ajar, iba ya oda tulu tila, tashir mashir etc ajaki kanga sabua jembiba aser tetshiba nungja (Terminology) ka lir. Aji saka iba ya kechi, kong nungi arur aser iba yagi temang nung kechi teyari mesura timtem agutsür, temang nung koda acha-ayangtsü (monitor), ta asüba tasüngdangbatem aika jungjunga melangzütetjungi aser memetetjemi aliba mapang ka nung iba tashitak nem kokdaktsür alir. Asenoki tali sabua aser bulua jembiba amaji, iba tashitak ya nisung aika dak kanga bulua adokba angur. Anungji iba ocet zülü tatsü ajanga Temulungjang aser Cholesterol ana ya kechi koma sendaktepa ali iba indang tongmelang agi adoktsür.

Cholesterol ya kechi ?:

Cholesterol ta asüba ya asen temang nung aliba temo(Fats) rongnung tongtipang shilem ka lir. Iba yagi asen temang nung Cells tasen adoktakja temang yangluloker, nerves meyirudaktsütsü atema meipanger(insulate nerves) aser temang nung tongtipang hormontem eg. estrogen, testosterone, cortisol etc. aser Vitamin D aser bile salts adokdaktsür.. Asen temangi nungdakba cholesterol ajak temesen (Liver) nungi peria adokdaktsür.

Saka iba dak alaka asenoki achiba temo aketba chiyungtsütem ajanga-ka cholesterol ya asen temangi aieter. Anungji kodang cholesterol level ya asen temangi nungdakba dang tali kümdir temang nung timtem balala atokdaktsür aser item rongnung temulungjang tashitakji tongtipangtiba rongnung ka lir.

Cholesterol ajanga temulungjang tashitak koda atokdaktsür ?

Kodang asen temang nung cholesterol level ya 200mg/dl dak tali kümdir itemji azü jajaba tezü(arteries) nung nangtena tezütemji melem-melema kümdaktsür (thickening of the arterial walls) koba dang "Atherosclerosis" ta ajar-temulungjang tashitak tapu ka. Iba yagi temulungjang nung jajaba azü tezü (coronary artery) lenmangji mesua kümdaktsür aser aji oda temulungjani azü peria maitteter mesura kenyongi meidaktsüi nokdang (the arteries become narrowed and the blood flow to the heart is slowed down or completely blocked). Azü yagi temulungjang ,tekolok aser temang tenüktelen ajaki nungtakba chiyungtsü(Nutrients) oxygen den meyokteper belener. Anungji kodang azü den chiyungtsüji temulungjang jagi nungdakba amaji peria maitlir, temulungjang nungji tashi meiti akümtsü aser ibaji ne toku ashiba(chest pain) ajanga nai metettsü. Iba amaji kodang azü jajabaji meshi-meshia noktangadokdir aser yakta anebalu mesulir, iba temulungjang tesemji teti atema raksa-a doker aser Heart attack ta asüba adokdaktsür.

Cholesterol tapu balala:

Cholesterol ya tapu ana nung angur; 1) Low density lipoprotein (LDL or bad cholesterol) koba dang cholesterol tamajung ta ajar, aser 2) High density lipoprotein (HDL or good cholesterol) koba dang cholesterol tajung ta ajar. Cholesterol tamajung yagi azü jajaba lenmang nokdang aser cholesterol tajungi itemji lapoktaktsütsü yarir aser cholesterol tamajungtemjia azü nungi samadaktsür. Item ana dak alaka temang nung Triglyserides ta ajaba temo tapu balaka lir. Kodang temangi nungdakba dang tali lidir iba yagia temulungjang tashitak atokdaktsür ta bushiteter. Tia makatsüji asen temang nung cholesterol talila liaka, iba ajanga asenoki yakta metettsüsa tangu-tashiba ya-a ta madokdaktsür saka temang telung nungbo tashitak tentetadoker alir. Anungji cholesterol level mapang shia tendanga alitsüba kanga tongtipang.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

North East India Christian Council Women Assembly agiogo



May 23-25 anogotem nung Shalom Bible Seminary, Sechü, Zubza, Kohima nung North East India Christian Council Women Assembly (NEICC) ayongzüka agidang tangokba noksa nung angur.

Kohima, Monupii/May 30, 2025 (Agencies): Nagaland Baptist Church Council Women Department-i Angami Baptist Church Council den ayongteper May 23 nungi May 25 tashi Shalom Bible Seminary, Sechü, Zubza, Kohima nung North East India Christian Council Women Assembly (NEICC) ayongzüka agiogo.

Anogo asemnü sentong nungji Northeast India tesem balala nungi tejaoker 650 shi aden.

Anogo asemnü sentong nung tekülem sentong aika agi aser tongti o jembirtemji NEICCWA Vice President Ruokuovinuo Noudi, COG M&A Jaintamon, General Secretary NEICC Rev. Dr. Ramengliana, Dr. Alongla P. Aier aser NEICCWA President Lalduhawmi Sailo nunger liasü. Shalom Bible Seminary

leniba nung tetushi aser tekülem agi. Kasa sentong nung Aizawl Area Baptist Choir, Ri Bhoi Synod Standing Choir, NBCC Choir aser Synod Mission Choir-i ken ajanga Tsüngrem tenüngsanga liasü.

NEICCWA nungsa o lemtepbasentongtem, Bible study sessions, sobaliba sentong aser NEICCWA kübok unit balala indang exhibition & sales liasü.

Iba sentong takok ngua agitetba atema NBCCWD-i shilem agir ajak dang pelaba lemsatep.

NBCC Women Department ya 1967 küm tenteta liasü. Taoba mapang School Education Director, Meyatola Longchar 1965 küm Orissa kübok Balasore nung 2buba Indian Women's Conference nung aden aser la meyipa aruba sülen laiAo Women Association

dang ketdangsüa Naga Baptist Women Union tentettsü ajungshia liasü.

Ajioda 1967 küm February 4 nü Noksangchila aser J. Savino na leniba nung senden ka ayongzüka Naga Baptist Women Union tentettsü telemtebba agia liasü.

1967 küm May 24 nü Mokokchung Town Baptist Arogo nung working Committee senden amen aser yangji NBWU ya NBCC kübok affiliate asüba tentet ka ta sangdonga liasü.

Mezüng office ketdangpurtemji - J. Savino Tir, Noksangchila Secretary aser Khriëü Sekhose Senyur liasü. Nagaland Baptist Church Council den tajungba amalitepa inyaksü atema 1985 küm 'Nagaland Baptist Church Council Women Department' ta nüngja melenshia liasü.

ANOGO ABEN TSÜNGREM DEN

Asüng kilirtem - T. Ken 78:1-8

Tarutsü putu asoshi asenok teinyaktsü lir. Ken züluri zülur, "Parnok chirtem dang nungi itemji onoki miima mayutsü, saka Kibuba tenüngsang, aser pa tashi, aser Pai inyakba sayatenyatem tarutsü putu dang ashitsü"(t.4).

Kechiba asenoki tarutsü putu den Tsüngrem o lemsateptsü? " Aser par tsürabur ama, tashi mangaba aser mazüoktetba putu ka"(t.7). Ibaji tarutsü putu asoshi parnok terünemba lir, kechiaser teimlai tarutsü dak repranger. Yisu Khrista shia aruba ajanga khristantem taküm aliba tamang nung tanaben aso. Asenoki metet asen Kibuba tanaben arutsü aser asenok asen kidang kotaki anir atutsü. Tanu lanur putu nung aikati teimla sen nung, sorkar dak mesüra parnok tashi dak teimla yur lir. Anungji asenok tarutsü putu dang parnok teimla Tsüngrem dak ayutsüba ashiba ajanga asenoki Kibuba temoatsü taruba putu den lemsateper.

Tanabuba, taruba putui Tsüngrem mapatem bilemtettsü asenoki aginer. Pai asenok asoshi inyakba amadoktsü koda temela ! Ajisüaka, asenoki taruba putu nem bilemdaktsütsüla. Shirnoki tesüiba amadoker parnoki maneni kasa aibelenji inyaker.

Tatamsa, taruba putui Kibuba ozüngtemji ayutsüsa asenoki Pa mapatem lemsateptsüla. Ken züluri ozüngren taküm indang mejembir. Pai Kibuba dang meima meimba indang jembir. Au putu tasen dang asenoki teinyaktsü ka lir,aser tatishitsü tajung, sayuba ajanga, lemsatepbba aser ajungshiba ajanga asenoki asen mapa ataloktsür.

Ne nem Khristan senmang agütsü. Kodang nai taruba putu den Tsüngrem o aser mapa, nai parnok dang senti lesson ka Pai pa nübur taküm inyakba sayur. Tatishitsü tajung ka alitsü merangang, koba tarutsü putui Kibuba asoshi alitsü tasü indaktsür.

Ethiopia PM Ahmed-i asentenshir mission mapa inyaktsü ayongzük



European Congress on Evangelism sentong nung Ethiopia Ato kilonser, Dr. Abiy Ahmed-i jembidang tangokba noksa nung angur.

Berlin, May 30, 2025 (Agencies): Germany yimtiba, Berlin nung European Congress on Evangelism sentong nung jembidang tetushi tejaoker Ethiopia Ato kilonser, Dr. Abiy Ahmed-i evangelical lenirtem dang alima nung asentenshir mission mapa inyaktsü aser telemsa tulu adoka aliba lima ka nung Arogoi tongti shilem agia inyaksü ayongzük.

Dr. Ahmed-i, "Khrista osangtajung ya nija atema dang masü, iba ya ajanga loktiliba nung temelenshi adokdaktür," ta ashi.

Ethiopia Ato kilonser, Dr. Abiy Ahmed tebu ya Muslim nunger ka aser tetsübo Khristan liasü. Pa ya Pentecostal Khristan ka aser pai mapang shia Ethiopian Full Gospel

Believers' Church nunga sayutsüngir.

May 27, 2025 nü European Congress on Evangelism sentong nung jembidang Dr. Ahmed-i nisung ajak taküm akhümket akhümstsüba meimtsü aser kin kecha mebendangi ajak aria meimtsü ayongzük.

"Evangelical movement nung iba ama temeim jagi tongti shilem agir, tetsüdaktsü balala kokteter aser yimjung atema lenmang lapoktsür," ta pai ashi.

"Khrista sülen anidakertem ama asenok ya alima nung metsü asütsü aser mapa agi temeim inyaka sayutsü ajar. Evangelical movement indang tangatetba metetdaktsüba dang masü saka evangelical movement indang temeim,

tenzüka aser yangerba-a metetdaktsütsü nüngdak," ta pai ashi.

Dr. Ahmed-i, "Telemsa tulu adoka aliba lima ka nung Arogo aliba metetdakja Arogoi tongti shilem agitsüla. Khrista osangtajung ajanga tatem maka teimla agütsüba dang masü saka alima nung meimchirtem nüngdak atema jembir," ta ashi.

Yisu Khristai tenzüka mapa inyakba atishia Yohan 8:12 nung ajemdaker Ahmed-i, "Yisu-i Pa alima tesangwa, ta ashi. Pai lenla ajaklen nungi inyak- Yisui shirangertem yari, ayartem nem chiyungtsü agütsü, Calvary nung dang masü saka Pai semdangba yim aser jila ajak nung aria bilemba temeim sayu. Yisu sülen anidakertem ama tamangertem ya alima metsü südaktsütsüla aser mapa agi temeim sayutsüla," ta ashi.

Dr. Ahmed-isa alima tesem balala nung Khrista osangtajung prokertem nem tetushi agütsü aser nüngtugu sayutsüngir Dr. Billy Graham nem-a akhüm agütsü.

Paisa akhidang Protestant Reformation nung ajemdaker evangelical movement tenzüka mapang nungi tenzüka tesülen George Whitefield aser John Wesley nungeri iba movement asentenshitsuiba lemsatep.

Dr. Ahmed-i, William Wilberforce tamang ajanga alar agiena liasü aser William Carey aser David Livingstone nunger ama missionary temi alima tesem ajaklen Khrista osangtajung prok, ta metetdaktsü.

Item missionary temi tekümtet osang sangdongba dang masü saka schools aser hospitals lapoktsüba den külemi terenlok mapa aika inyaktsü; ibaji ajanga tanela nüngdak dang masü saka ali-shi nüngdak-a agüja taküm aika kümzük aser Africa o Europe na tsüngda tesendaktep junga yangertsü, ta Dr. Ahmed-i ashi.

Dr. Ahmed-isa, Aso 20buba tesadang nungbo anüolen alirtemi mission mapa inyakba ajema aküm, anungji iba ya jungjunga shisadangba sülen telemtebba agia inyaktsüla, ta ashi.

Dr. Ahmed-i, "Alima nung Arogo indar, talisa Global South nung Arogo tashi itta indar aser mission mapa tulu atemzüka inyakdar. Arogo ainba ajanga partnerships yanglua alima nung lemsateptsü atema maongka angur," ta ashi.

"Tanü alima nung teimla kanga nüngdaker. Tesüiba mapang sayutsüngirtemi

inyakba ama asenoki longjemer inyaktsüla. Temelenshi yongyaba putu ka nung yimjung aser temelenshi osangtajung lemsateptsü atema asenok ajar," ta pai ashi.

O tembanga pai evangelical lenirtem dang Nehemia, Zerubbabel aser tenyar Paul nunger ama tasü itta ochi agi inyakba ajanga alima nung temelenshi adokdaktütsü ayongzük.

"Alu jenti menzüka lir, saka mapa inyakertem ishika dang" ta shia pai, "Asenok jakdang wadang tulu lir. Ajemalua telemtebba agir inyaktsüpurtem rongnung yangi adenshia alirtem-a densema lir ta ni amanger," ta paisa shisem.

European Congress on Evangelism tetenzük sentong nung sayutsüngir Franklin Graham-i "The Command of God to Preach the Gospel," onük nung ajemdaker okila jembia liasü. Iba sentong nung o jembirtemi Yisu Khrista mapang Pa sülen anidakertemi leper tazüng anguba sülen alima tesem ajaklen tasü itta Khrista osangtajung prokba nung ajemdaker lokti ayongzüka liasü.

European Congress on Evangelism sentong nung linük 56 nungi Evangelical lenir 1,000 dak tali denogo.

AO OSHI ANGAZÜKDAK:
TANÜ ANGAZÜKTSÜBA OJANG



Teni

(n) temang nung temenemtetsü shilem (nose)
* Teni telonglen teti merüka ayutsüla.

Tenikijang

(n) teni teki, teni nung tapok (nostrils)
* Tenikijang ajanga asenok tango sashir.

OLONG PAITEP # 7167

			1		2		3		4
5		6							
		7					8		
9					10	11			
				12				13	
	14								
15									
			16		17			18	19
20					21		22		
							23		
24									

TIPIEN

3. Telunglen masü
5. Tanü-asüng
7. Külemi
8. O tali jembi
9. Songtem
10. Ozü tapu ka
13. T ___ daker
14. Mangdang masü
15. Alima nungi pila
16. T ___ ng
18. Tashi agi ola adok
20. Sen yong agütsü
21. Te ___ sü
23. Zübo aket
24. Tsükchirtemi longpanger rara

LANGTSÜNGLEN

1. Ishika
2. Nisan
3. Tatutsü
4. Amoa ao
5. Temelen anguba
6. Jang asepha
11. Kanga korema jashi
12. Tebang nung enok
13. Taa kecha mali
14. Asür li
16. Inyaktet
17. Entsü amokbang
19. Aonsotsü tsünüdak
22. Langka chinüa ait

OLONG PAITEP # 7166 TELANGZÜBA


TIPIEN :

Kasa, 6. Rangben, 7. Mait, Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

Khu, 2. Süjak, 3. Onük, 4. Oba, Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Tajü, 21. Ano, 22. Onü, 23. Kua.

NAI-A YA METETTER MA



South Indian cinema indang golden era nung actress Sheela Celine aser actor Prem Nazir nati on-screen partnership tajung ka yanglutetba agi Guinness Book of Records nung "most enduring actor pair in Indian film history" ta züluoka lir.

Shella aser Prem nati film 130 tashi nung külemi shilem agia liasü aser item nungi film 50 tashi 'box office hits' liasü. Tenati 1963 küm Kaattumaina film nung mezüng shilem agia tenzük

Tripura nung tzünglu kanga aruba agi relief camps lapoka lir

Agartala, May 30, 2025
(Agencies): Tripura nung May 29, 2025 nungi tenzuka tzünglu kanga aruba ajanga ki 93 raksaogo aser nisung 207 tashi relief camps pezü nung anioka lir.

Tripura kübok West District nung tzünglu kanga aruba ajanga khuret aika ajurua lir ta State Emergency Operation Centre-i ashi.

West District kübok Jirania Sub-division nung ki 9 kanga mejungi raksa aser

32 terara raksaogo. Mohanpur Sub-division nunga ki 17 kanga mejungi aser 19 terara raksa ta ketdangsürtemi ashi.

South District kübok Belonia Sub-division nung ki 11 kanga mejungi raksa aser Panisagar nung 5 terara raksaogo ta parnokisa ashi.

Tzünglu kanga aruba ajanga West District nung relief camps asem lapok aser idakji nisung 165 jenoka lir. Khowai nunga relief camp ka lapok aser idakjia

nisung 42 jenoka lir. Tzünglu kanga aruba ajanga tesem aika nung süngdong aika laodakja lenmangtem shibanga liasü saka Tripura State Rifles jawans aser volunteers ajanga lenmangtem lapokogo. Howrah, Gomati, Muhuri, Manu aser Bijoyayongtem nung danger aser warning levels alema tzu ayimer. IMD-i North aser Unakoti district ana atema "red alerts" sangokja lir.

Kharge aser Rahul nati Assam Congress den ajurutep

Guwahati, May 30, 2025
(Agencies): Congress president Mallikarjun Kharge den Rahul Gandhi nati May 30, 2025 nü Assam nungi Congress lennirtem den senden ka menogo.

Assam nung sangküm assembly election agitsü aliba atema asalentong yanglutsü

senden amen. Assam state unit nung Gaurav Gogoi president ser ketdangpur tasen shimba sülen iba ya mezüng senden menogo. Indira Bhawan headquarters, New Delhi nung amenba senden nung AICC general secretary K C Venugopal aser Assam in-

charge & party general secretary Jitendra Singh na aden. "President Mallikarjun Kharge lenisüba kübok tanü Congress Headquarters Indira Bhavan nung Assam Pradesh Congress Committee züngsem tasentem den senden ka menogo" ta Rahul Gandhi-i metetdaksü.

Assam sorkari Gujarat aser Odisha nung senotsü teyari agütsü

Guwahati, May 29, 2025
(Agencies): Assam Chief Minister Himanta Biswa Sarma-i tuyuba ama state sorkari Pahalgam kiralongraba lendong nung asür kibong ana nem May 28 nü senotsü teyari agütsüogo.

Water Resources Minister Pijush Hazarika-i Surat, Gujarat nung Shaileshbhai Himmatbhai Kalathiya'er kibong aser Health & Family Welfare minister Ashok

Singhal-i Balasore, Odisha nung Prashant Kumar Shatapathi'er kibong nem senotsü teyari agütsüogo. Iba mapang kibong anaprong nem Chief Minister Himanta Biswa Sarma-i mangyimba shidi züluba agütsü. Hazarika-i Shaileshbhai'er kibong den ajurutep aser Assam nung alirtem tenüng nung mangyimba lemsatsep. Shaileshbhai tebu Himmatbhai Kalathiya aser

kinungsü Sheetalben nati Minister Hazarika, Chief Minister Sarma aser Assam nung alirtem dang aria bilemtsüba atema pelaba metetdaksü. Minister Hazarika-isa Bhavnagar, Gujarat nung Pahalgam lendong nung asür kibong ana den ajuruteptsü. April 22, 2025 nü Jammu and Kashmir kübok Pahalgam nung kiralongrartemi Nepali nunger ka dena nisung 26 khaset.

Gaurav Gogoi-i Jun 3 nü APCC president mapa agizüksü

Guwahati, May 30, 2025
(Agencies): Gaurav Gogoi-i June 3 nungi Assam Pradesh Congress Committee (APCC) president inyak tenzüksü.

Gaurav ya Lok Sabha nunga Deputy Leader of the Opposition inyaker.

Iba sentong atema Congress party-i Rajiv Bhawan, Guwahati nung senden ka menogo.

Senden amenba sülen APCC Working President Zakir Hussain Sikdar aser General Secretary Bipul Gogoi

nati Gaurav Gogoi indang sentongtem lemsatsep.

May 31, 2025 nü Gogoi New Delhi nungi Jorhat tonga aruogo aser local Congress züngsemtem aser public den ajurutepa sensaksem mapang ka agiogo.

June 1 nü pai Nazira nung Assam Legislative Assembly Opposition Leader Debabrata Saikia-i ayongba senden nung adentsü. Gogoi Sivasagar nung yipzüksü aser idakji party züngsemtem den ajuruteptsü.

June 2 nü pai Jorhat aser

Golaghat ajanga Nagaon-i aotsü aser lenmang nung public sentongtem aser sendentem nung adentsü.

June 3 nü pa Guwahati atongt sü aser idakji Manvendra Sharma Complex nung sentong ka nung APCC President mapa agizüksü.

"Congress-i ochimashi aser tetsübu maliba state ka akümtsü anungji Assam nung alirtemi Congress den teka amteptsü ayongzüker" ta Gogoi-i video message ka nung ashi.



Assam state cabinet-i Indira Gandhi Athletic Stadium tenüng melentsü telemtetba agiogo ta Chief Minister Himanta Biswa Sarma-i metetdaksü. Indira Gandhi Athletic Stadium dang Sarusajai Sports Complex ta-a ajar saka iba ya Arjun Bhogeswar Baruah Sports Complex ta melentsü. Arjun Bhogeswar Baruah ya taoba Assamese former-athlete & coach ka liasü. Assamese nunger kati international event (800-meter race at the 1966 Asian Games) nung gold medal angurji pa liasü.

US-i ceasefire atema sentong benokba yagibo Gaza nung maneni tepsettsü: Hamas

Gaza City, Monupii/May 30 (Agencies): Israel den ceasefire alitsü atema United States Tir Donald Trump administration ajanga proposal agütsüba ya Hamas-i tang jembishinüba mapang lir, saka tang yimya nungbo Gaza nung tepsetba aser ayawara maneni alitsü, ta Palestine nung telok nungi ketdangsür kati ashi.

White House Press Secretary Karoline Leavitt-i Brehostibarnü ashiba agi, Israel-i iba ceasefire proposal nung meyongnem agütsüogo aser Trump administration indang Middle East envoy Steve Witkoff-i ibaji Hamas nem agütsüogo.

Hamas political bureau member Basem Naim-i osangbener dang ashiba agi, iba deal yagi ozü nüburi akhangba kecha magütsysür, aser item rongnung tongtipangsa rawa anentsü shia mali.

"Ajisüaka movement indang lenirtemi linük khuret angateta proposal nung telangzüba agütsütsü asadanger," ta Naim-i ashi.

Hamas-i Hokulbar mesüra Honibarnü telangzüba agütsütsü, ta Palestine nung telok nungi osang ka ajanga ashi.

Proposal tasenba indang osang tejangja yimjak nung sangdonga mali, saka Hamas ketdangsür Sami Abu Zuhri-i ashiba agi, yangji Gaza nung rara anentsü, Israel sepaitem anizüker aotsü mesüra teyari oset tenokdangba makai aitdaksütsü Israel nungi tejangja shia mali.

Draft copy ka athishia, proposal nungya mezüngbo anogo 60 ceasefire alitsü shia lir, ta Reuters ajanga ashi. Israel nung pua aliba nisung 28,

takum aser tasü, ya mezüngbuba hopta nung chioktsü aser iba melen Palestine nung tepuokdak alir nisung 1,236 aser Palestine nung tasü mang 180 agütsütsü.

Tir Trump aser mediators Egypt aser Qatar ajanga guarantee agüja aliba sentong nungya Hamas-i meyongnem agütsülü Gaza telungi teyari osettem yoktsü shia lir.

Israel sorkari yimjak nungbo tang tesüsa benokba ceasefire sentong agizüker ta shia mali.

Israel Ato Kilonser Benjamin Netanyahu-i tang tashi Gaza nung pua aliba kinunger tem dang pai Witkoff indang temporary ceasefire proposal nung aliba ama inyaktsü renema lir ta shiogo ta Israel media ajanga ashir.

Gaza nung ceasefire alitsü merangba nung Israel-i Hamas khenyongi nok-nü mamshitsü densema rara tembangtsü atema teinyaktsütem nung mangatettep adoka arur. Hamas-ia Israel sepaitem Gaza nungi ainshitsü akhanger.

Hopta tetenzüklen osang ka nung Hamas-i Witkoff den ceasefire "general framework" atema tangatettep kati arugo aser tatembang telangzüba kisü ngatar ta shia liasü.

"Teti asoshi ceasefire alitsü, Gaza nungi Israeli occupation forces ajunga ainshitsü aser humanitarian aid nung tetsükdaktsü makai aittsü asoshi Witkoff den general framework ka nung onoki agreement agitepogo," ta iba teloki sangdong ka nung ashi.

Agreement nungya ceasefire sangdongba sülen Gaza ketdangsütsü asoshi professional committee ka amenoktsü densema lir, ta Hamas sangdong ajanga ashi.

Iba tezüngzüktep nung shilem ka ama Trump-ia anogo 60 tsüngta ceasefire alitsü aser Gaza nungi Israel sepai ajunga ainshidaktsütsü guarantee agütsütsü shia lir.

Ajisüaka mapang tatsüka lir Witkoff-ibo pai benokba tezüngzüktep nung item talenba mali ta shia liasü.

Witkoff den yariteper US ketdangsür kati Hamas-i sangdongba ya meshidak ta ashi aser Israel-ia iba sangdong ya "psychological warfare" aser tiazü osang prokshiba dang lir ta ashi.

Israel-i Gaza nung raraba March 18 nü tenzükshia liasü, koba hopta trok ceasefire aliba raksaba liasü aser Netanyahu-ia tashi ajak amshia rara tenzükshiogo ta sangdong.

Iba sülen Israel mitkar temi Gaza tesem ajungalen tanen makai amakba nung nisung 4,000 jungnüa tepsetogo aser tang tashinung iba linük nung nisung 54,000 dak tema süogo, ta Gaza nung aliba heath ketdangsür temi ashir.

Israel-isa Palestine nung aliba tesemi humanitarian aid yokba ajunga ita aika nokdang aser UN ketdangsürtemi Israel-i yamaji inyakba ajanga nüburtem ayawara tia nung lir ta shia liasü.

Israel-i tenokdangba shilem kar May 19 nung agiena teyari osettem Gaza telungi tera yok, saka United Nations Secretary-General Antonio Guterres-ibo ibai "teaspoon" ka dang lir ta ashir.

Tan hopta US aser Israel nati yariba Gaza Humanitarian Foundation ajanga chiyongtsü lema agütsüba tonga yaseta aliba Palestine nung aotsü merangba ajanga rongrong adoka liasü.

Russia den jembishinü akatsü Ukraine-i telangzüba agüja mali

Kyiv, Monupii/May 30 (Agencies): Taruba hopta Istanbul nung linük ana tsüngta senden nung adentsü meyokdang ceasefire asoshi Russia-i aginüba tejangja document nguner, ta Ukraine-i ashir aser külen Kremlin-i iba senden nung rara anena atatsü asoshi linük ana tsüngta jembishinü akatsü imlar ta ashir.

Hokulbarnü Kyiv nung osangbener senden ka nung jembidang, June 2 nü jembishinü akatsü Russia-i asüngdanga aliba nung Ukraine shilem agitsü indang Foreign Minister Andrii Sybiha-i mashi aser Kremlin-i shidakba nung rara tatem kati arudaktsüner ta ashiba aginer ta ashi.

"Sentong yanglua aliba senden nung tajangzük alitsü asoshi document jelia angutsü tongtipang, aji asünung dang senden nung adentsüपुरi jembishinütsü tashi alitsü," ta pai ashi.

Tang tashi Russia indang

proposals keta aliba document kata Ukraine-i mangu, ta pai ashi.

Küm asem dak tema lir linük ana ya tesüsa Istanbul nung May 16 nü mezüng ajurutepa liasü. Iba senden ya ghonda ana junga mamen aser ceasefire asoshi jembishinüba nung tajangzük kecha meliasü. Linük ana tsüngta tepuokdak alirtem melenteptsü mulungtep aser anogo ishika lir yamaji inyak aser yimjung asoshi roadmaps indang documents melenteptsü mulungtepa liasü.

Iba senden sülen Ukraine-i temulung masüba lemsatep aser ceasefire ka züluteptsü tashi maliba junior delegation ang Russia-i yokba ya akumtsübo maliba yimya lir, ta Ukraine Tir Volodymyr Zelenskyy-i ashi.

Ukraine Foreign Ministry odongtar Heorhii Tykhyi-i Brehostibarnü X nung, Russia-i ceasefire proposal lemsateptsü mapang agiba ajanga par taginüba ya asangsang nung

tamakoktsü agi sünga lir ta sayur, ta ashi.

Hokulbarnü Turkish Foreign Minister Hakan Fidan den külemi osangbener senden ka nung jembidang, Kyiv-i rara tembangner, ta Sybiha-i ashi.

"Onoki iba rara taküm tembangner, aser truce ka amenoktsü janrar, anogo 30, mesüra 50, mesüra 100 asoshia asüyonga kecha masü," ta pai ashi. "Ukraine-i iba indang Russia den indang-indanga jembishinütsü mulunga lir. Taoba senden nunga onoki iba indang shiogo."

Taruba hopta senden ya menra, iba sülen Turkey Tir Recep Tayyip Erdogan leniba nung Zelenskyy, Russia Tir Vladimir Putin aser United State Tir Donald Trump senden amentsü akok, ta Fidan-ia ashi.

Külen Kremlin odongtar Dmitry Peskov-ia linük ana tsüngta jembishinü junga akaba ajanga dang iba ama senden ya amentsü, ta ashi.

Menungra Bilemteter



LT. TEMJENKOKLA LONGCHAR
31-05-2024

Amadoktsü makokba temeim AKOKLA nai toktsür oer küm ka abensar, tanü na onok den akümüli nung meliaka onoki iba anogo na menungraseta Sarasadema amonger.

~ Temeim kinungbo, chirmur, oja, odi, oya aser kinungertem.

GOVERNMENT OF NAGALAND OFFICE OF THE DIRECTOR GENERAL HOME GUARD, CIVIL DEFENCE & STATE DISASTER RESPONSE FORCE NAGALAND, KOHIMA.

NOTICE

Dated, Kohima the th May '25.

NO.HG/Estt(A)-3/ 2021 : This is to notify that vide Advertisement NO.HG/Estt(A)-3/2021/50 dated 14th April 2025, the list of shortlisted candidates and other relevant details are uploaded in the department website (www.hgcdsdrf.nagaland.gov.in).

**Sd/-
RENCHAMO P.KIKON, IPS
Director General**

China den shishilempaba ken o jembiba anendaka lir: US

Washington, Monupii/May 30 (Agencies): US aser China tsüngta shishilempaba ken o jembiba tera anendaka lir, ta US Treasury Secretary Scott Bessent-i ashi.

Alima nung economies tulutiba linük ana tsüngta tayang kepzüktepa tariffs meshiba khen asoshi anena atatsü mulungteper hopta asem majungdang pai iba o ya ashi.

Iba jembishinü nung linük anaprong lenir shilem agitsü nüngdaktsü ama nibo bilemer, ta Bessent-i Fox News dang Brehostibarnü ashi.

US Tir Donald Trump-i alima nung tariff inakyim ka sangdonga aliba ya pa tashi alema inyak, ta court kati Bodhbarnü obendang agüja liasü. White House ajanga iba telemtetba jembishitsü ken o benokba sülen pa indang sentongtem khen atema amshidaktsür.

Switzerland nung jembishinü akaba sülen ita tetenzüklen US aser China linük anaprongi imports nung tariffs meshia aliba ajemtsü shia liasü.

Iba tezüngzüktep nung linük anaprongi tariffs kar athi aser danga tem anogo 90 asoshi anena liasü. Bessent-i ano maneni tezüngzüktep alitsü asoshi jembishinüba nung tashi samaogo saka maneni jembishinütar ta ashi.

"Asenok hopta ishika tsüngta ano maneni China den jembishinü akatsü imlar aser khen bo tir aser China Tir Xi Jinping tsüngta jembishinütsüsa akumtsü südi ta amanger," ta

Bessent-i Brehostibarnü ashi. Tena tesendaktep tajung lir aser Tir Trump-i pa taginüba metetdaktsü dang China langpangi arutsü amanger, ta pai ashi.

Ita tetenzüklen tezüngzüktep ka yangluba kübok US-i China nungi bener aruba oset nung tariffs shilem 145 meshia aliba ajema shilem 30 meshir.

China-i tayang kepzüka US oset nung tariffs shilem 125 meshia aliba shilem 10 dang meshir.

US Tiri ashiba agi, bendang len nungi oset bener aruba nung tariffs meshiba ajanga US consumers temi America nung yangluba oset tali alitsü ajungmesotsü aser osettsüset yangluba mapa tanaben bener arutsü aser tax revenue tali akumtsü.

Danga linüktem den trade deficits ajemtsü meranga jembishinü akaba mapang Trump administration-i iba maongka ya amshia arur.

Japan nungi ketdangsür telok ka Hokulbarnü Washington nung US ketdangsür den maneni shishilempaba indang jembishinü akar.

US trade deals kar terenem leni arur saka kar kanga tali tepenja lir, ta Bessent-i ashi.

Trump-i pa indang tashi tali amshia tariffs meshir ta US Court of International Trade ajanga obendang agütsü.

Ajisüaka White House nungi lower court totuyuba agütsüba khen atema soita atatsü asüngdangba federal appeals court kati mela.

Diego Maradona asüba ken o nung mistrial sangdongogo



Buenos Aires, Monupii/May 30 (Agencies): Diego Maradona indang medical teamanema homicide (nisung kati ka tepsetba) ken o ya mistrial ta sangdongogo, ta defendants atema okatsür temi ashi, kong football asayar takotet aser national hero Maradona 2020 kum asüba sülen Argentina anakshitsü.

Ken o tasen jembishinü tenzütsü atema anogo sangdonga mali aser judges tasen ano meshim. Iba ken o nung judges asem rongnung Judge Julieta Makintach ya yimya meshidak amshi ta aitsüba ajanga Mongulbarnü mapa nungi anenba sülen iba telemtetba ya agia liasü.

Argentina team-i Mexico nung 1986 World Cup akokba mapang Maradona-i kanga junga asayateta liasü, aser pa tekolak teret aser tekolak tsüngta haematoma adokba surgery agir taneptsü anguba mapang temulungjang mapa meinyaki asü. Pa arishi kum 60 liasü.

Pa asüba ajanga linük anakshitsü aser alima tesem ajunga nung mang ayim, talisa Italy kübok Naples nung khu-khua mang ayim, kong 1980s tiyonglen aser tatemlen Napoli team ya pai temaba jenjangi ajungketa liasü.

Maradona ya football asayadak asayar tajungtiba rongnung ka ta züngshir, shiba kum aika temesepba mozü metoktsüteti timtema aru aser pa Naples nung aliba mapang yangji aliba underworld den tesendaktep liasü.

Pai 1986 World Cup asayamung nung asayaba ya saisapong tsütsü otsü tajung ka akum. Iba kum quarterfinal nung mezüng goal agütsüba dang 'Hand of God' ta tenüng

jatsü aser iba sülen England madak takok ngua iba asayamung marok ajangzük. Iba mapang kum pezü jakdang linük ana ya Falklands Islands mechi rara teashi ka rarar liasü.

2000 kum football governing body Federation Internationale de Football Association (FIFA) ajanga "Player of the Century" nüngja asayar ana nem agütsü aser ibaji ka Maradona aser ka Brazil nung Pele liasü.

Pa indang medical team nungi nisung teneti mapa shidak meinyakba ajanga pa südaksü ta aitsü, aser iba kum o ya March 11 nungi jembu tenzüka liasü. Defendants temi Maradona anepaluba mapang "simple homicide with eventual intent" ta aitsüba magizük. Parnok ya kum ti nungi 25 tsüngta tepuokdak ayutsü liasü.

Buenos Aires courthouse indang corridors nung aser la indang office nung documentary ka nung shilem ka ama camera crew den Makintach-i sensaksemba video temai adok, koba judicial rules nung aibelen liasü.

Liverpool-i sen £29.5m agi Frimpong alizükogo


Liverpool, Monupii/May 30 (Agencies): Liverpool-i Bayer Leverkusen nungi sen 35m euros (£29.5m) agi kum pongu asoshi Jeremie Frimpong alizükogo.

Club World Cup nung asayatsü asoshi Trent Alexander-Arnold ya Real Madrid nung adentsü ta Anfield club ajanga jangjatsür ghonda ishika dang lir Premier League champions yagi kum 24 tejen release clause amshia Dutch nung Frimpong alizüksü mera agiba metetdaksü.

Nisung aikati Arne Slot indang squad nung Frimpong ya Alexander-Arnold melen anioker ama repranger.

Leverkusen-i 2023-24 nung Bundesliga title mezüngbuba abendang Frimpong-i tongti shilem agia liasü aser 2024-25 nung parnok tanabuba jenjang nung tembang dang pai asaya 53 nung shilem agia liasü.

Frimpong ya right-back nung Northern Ireland defender Conor Bradley den tokteptsü, shiba tawa ang club den kum pezü contract tasen



zülutepa liasü.

Dutch nungba ya lanuwa Manchester City nungi asaya liasü aser September 2019 nung Celtic dangi ao aser January 2021 nung Leverkusen dangi ao.

Liverpool nungya Dutch nung Virgil van Dijk, Cody Gakpo aser Ryan Gravenberch lir, aser yangji Frimpong adentsü.

Liverpool ya ano Florian Wirtz alizüksü asoshi Leverkusen den jembiba mapang lir.

Germany forward Wirtz atema jembishinüba tatemleni arur aser add-ons densema sen £109m agütsütsü renema lir.

STATE OSANG :

Tapak 2 nungi...

KPC, MPC, DPC & NSCN ajanga KV Nurumi asükhu lemsatep

DPC ajanga mangyimer kibong den asükhu lemsatep. Jenjang tulu aketba osangbener ka samaba asoshi onoki mang ayimer. Kinunger nem tashi aser anisüngzük agüjang ta sarasademtsür, ta DPC sangdong ajangasa ashi.

Osangbener nübu tejangja Khetoho (Toto) Nurumi tia makai May 30, 2025 nü Olive Hospital, Dimapur nung asüba

temulung agi magizükteter, ta NSCN/GPRN tir Akato Chopi-ia sangdong ka nung ashi.

Ni Asür Nurumi den metetteper arudang takum nung yimya tajung ajak pa dak keta liasü, tezülur tajung, temulung rakpoka jembiba nisung aser tasü tait nübu ka liasü.

Pa dak sempet tajung liasü aser pa asüba ya media

fraternity aser talisa Sumi aser Naga nung asoshi takoksa tulu alitsü, ta pai ashi.

Ni asoshi tembar tajung aser temeim aketba adianu ka samaogo. Tajung Tsüngremi pa tanüla teti tatem maka tesunep nung anisüngzükjangma aser mangyimer kibong nem tesuneptsüba agüjangma, ta sangdong ajanga ashi.

Nagaland Solar Mission Sensitization Program Dimapur...

Iba scheme nung shilem ka ama temsüa aliba kibong temi subsidy nungi tajangzük angutsü, smart meters angati angutsü aser bank loans melamela agitettsü. Iba inyakyim yagi electricity bill kanga ajemtsü, koba ajanga rongsenketzüng aser libajen tsütsü tajangzük alitsü.

Chief Secretary-i Dimapur nung temsüa aliba kibong ajunga iba scheme atema tenüng zülüoktsü ajungshi aser iba ama maongka tajung ya

agitsü ayongzüka liasü.

Senden nung Additional Chief enginner (Design & Regulation), Er. R. Lobosang Jamir-i Nagaland Solar Mission indang PowerPoint presentation tejangja agütsü.

Iba mapang state sorkari solar energy tali amshidaktsütsü asoshi subsidies, technical teyari asern public outreach indang pai lemsatepa liasü.

Tang iba inyakyim ya district nung alirtem atema kisüng lir.

Iba senden tembangba sülen Chief Secretary, Dr. J. Alam, IAS ajanga Dimapur semdanga terenlok mapa tang teinyakdak aliba, talisa Nagaland Solar Mission dak rangloker tesem balala sema jaja liasü. Iba mapang pai State Institute of Hotel Management, Purana Bazaar B nung tesayur aser kaketshir tem den sensaksem aka aser iba sülen Toluvi nung Common Facility Centre semdanga liasü.

NHPS ajanga ABPM-JAY aser CMHIS indang workshop ayongzük

Workshop tenzüka Dr. Kikameren Longkumer, Joint CEO, NHPS ajanga pela agizükba o jembu aser iba sülen Livitoli Sukhalu, NCS, Deputy CEO, NHPS ajanga scheme rangben reprangshima liasü.

Iba workshop nung Neitsophe Sekhamo, Beneficiary Verification Consultant; Seyievito Denny Kin, Data Manager cum

IT Support; Dr. Akaholi V. Zhimomi, Medical Officer aser Dr. Imlinenla Longchar, Monitoring and Evaluation Manager nungeria jembia liasü.

Iba den FY 2025-26 atema insurance partner tasenba, Reliance General Insurance Company Limited nungia Medco/PMAM atema claim adjudication processes indang

tongtipang session agüka liasü.

Iba workshop nung district ajunga nungi Chief Medical Officers (CMOs)/Deputy CMOs, empanelled hospitals ajunga nungi Nodal Officers, PMAMs, Insurance Company nungi ketdangsürtem aser processing team aser District Programme Coordinators tem dena liasü.

INDIA OSANG :

Tapak 3 nungi...

Operation Sindoor sülen 'foreign policy' tamakok...

May 7 nü India sepaitemi Operation Sindoor agiba mapang nung Pakistan nung asürtem atema Colombia sorkari Pakistan den mangyim jashi lemsatepba atema Tharoor-i mepelaba lemsatep.

Tharoor-i, "Amakertem aser pusemertem tsüngda tepila kecha mali," ta ashi.

Tharoor-isa Pakistan-i kiralongrartem pusemba aser kiralongraratem asüpila sentongtem nung Pakistan

nung sepa ketdangsartem adenba noksa sayu.

Operation Sindoor outreach küobk Tharoor-i aniba Parliamentary telok nung züngsemtemji Sarfaraz Ahmed (JMM), Tejasvi Surya (BJP), Ganapati Harish Madhur Balayogi (TDP), Shashank Mani Tripathi (BJP), Bhubaneswar Kalita (BJP), Milind Deora (Shiv Sena) aser taoba mapang Indian Ambassador to US, Taranjit Sandhu nung lir.

Congress aser RJD-i SC, ST aser OBC...

par kibongi yimsüsüba mapang nung nüburtem ket nungi ali rakzük, ta ashi.

"Congress aser RJD nung lenirtemi loktiliba temeden nung ajemdaker SC, ST aser OBC nüburtem dang ashioktsü. Tanü sensakertem timtemba ya parnok ajanga lir, ajisüaka tangbo item lenirtemi sorkar tashi arishir," ta pai ashi.

RJD tongti, Lalu Prasad aija Modi-i, "Bihar nung RJD sorkar mapang pa aser par kibongi sensakertem dang nungi ali rakzük. Parnoki sensakertem ajungtsü atema mebilem. Arem yimsüsüba liasü," ta metetdaksü.

Paisa, "Chief Minister Nitish Kumar-ibo state lenla ajak nung terenlok atema inyakogo. Terenlok Bihar medeni Terenlok India akümtsü makok," ta ashi.

Operation Sindoor dak sendakba nung Modi-i, "Operation Sindoor takok anguba atema ni sepaitem nem tenüngsang agütsür. India-i kiralongra anema maneni raratsü. Asen sepaitemi Pakistan telung nung kiralongrar camps amak," ta metetdaksü.

Bihar nung lanurtem nem tenüngsang agüja pai, Indian armed forces nung Bihar nungi lanurtemi tongti shilem agir, ta ashi.

"Jammu & Kashmir kübok International Border nung Pakistan nung shells ajanga poksetba BSF sub-inspector Mohammed Imtiaz nem ni akhüm agütsür," ta pai ashi.

Modi-isa, "Kiralongrartemi Pahalgam amakba sülen anogo ka lir ni Bihar semdangba mapang nung kiralongrartem camp amaktsü ta ashi. Ni iba tenangzükbajiataloktsüogo," ta ashi.

BILEMDANGANG

"Shibai na ain aitdaksür, pai na akoker."